



Sun Development Resorts ricibiendo reconocimiento Internacional

Cu un orgullo inmenso e resorts nan di Sun Development Casa del Mar, Playa Linda Beach Resort y Costa Linda Beach Resort a ricibi e reconocimiento maximo di Resort Condominium International (RCI) esta e Gold Crown Award pa 1998.

E reconocimiento bunita y alentador aki, cu a inicia na 1992 door di RCI, ta uno cu ta premia y reconose e facilidadnan superior di e resortnan y e servicio di calidad halto cu na un manera consistente ta wordo otorga na miembronan di RCI y e miembronan di cada resort. Ricibi e RCI Gold Crown Award ta muestra sin duda algun e compromiso cu Sun Resorts tin pa cu mehoracion continuo, servicio di Calidad halto y satisfaccion di tur esnan cu ta bishita nos dushi isla Aruba superando nan expectativanan.

E resortnan di rond mundo afilia na RCI (mas di 3200 cu mas di 2 millon miembro), un compania di intercambio pa miembronan di Time Share resorts, durante 12 luna ta wordo evalua door di esnan cu pasa nan vacacion den e resort. Cifranan ta wordo compila ariba Calidad di e resort, servicio otorga y e experiencia total di vacacion mas un evaluacion di e facilidadnan di e resort y su servicionan adicional.

Durante un cocktail party Gerente General di tur e Sun Resortsnan hunto cu Gerencia di Sun Development a reuni hunto cu tur hefe di departamento y assistentenan pa asina celebra e reconocimiento especial aki cu tur 3 Sun Resorts a ricibi pa 1998.

Pa e ocasion aki vice presidente di RCI, Sr. Shawn Ericson, a hasi entrega di e RCI gold crown awards nan na e 3 Gerente General nan di Sun Resort. Sr. Ericson den su discurso a gradisi Sun Resorts pa ta parti di RCI y a felicita tur 3 resort pa nan compromiso pa cu Calidad y satisfaccion di tur bishitante.

Sr. Ericson a splica durante su discurso cu unicamente 17% di tur e mas di 3200 resortnan di RCI a ser honra cu e reconocimiento Gold Crown pa 1998. Sr. Ericson a sigui splica cu Casa del Mar, Playa Linda Beach Resort y Costa Linda Beach Resort ta pertenece na un grupo sumamente special y unico ya cu unicamente 3% di tur e resortnan afilia na RCI a sa di ricibi e premio aki pa 7 anja consecutivo (for di su inicio na 1992).

Sumamente special ta alavez e hecho cu Aruba Beach Club pa di dos anja consecutivo a ser honra cu e International Distinguished Award di RCI.

Na e ocasion aki Gerente General di Playa Linda Beach Resort, Sra Betty Werleman, a gradici RCI pa e Gold Crown Award cu tur Sun Resorts a ricibi pa di 7 anja consecutivo y a felicita tur e hefenan di departamento pa e esfuersonan hasi pa logra esaki. Sra. Werleman a enfatisa energicamente cu e premio aki ta uno cu ta wordo ricibi cu hopi aprecio danki na e lealtad, carinjo y esfuersonan incansabel di cada un trahador di Sun Resorts cu ya a hasi e Gold Crown Award un meta di tur anja ariba cual tur departamento hunto ta traha pa logra esaki.

Sra Werleman tambe a enfatisa di ta sumamente orgulloso di cu Sun Resorts a sa di mantene e reconocimiento Gold Crown durante 7 anja especialmente den e industria di Time Sharing cu ta exige asina hopi ya cu e miembro di un time sharing ta uno cu hopi experiencia y ta uno cu hopi expectativa. Sra. Werleman tambe a menciona e hecho di cu nos mercado laboral ta uno sumamente dificil pero cu danki na esfuersonan incansabel y bon comprendemento di principionan di calidad hunto nos a sa di mantene e reconocimiento especial aki. Sra. Werleman a enfatisa cu e RCI Gold Crown Award ta uno cu ta dedica na tur e empleadonan di Sun Resorts ya cu esaki ta resultado di comprendimento, compromiso, responsabilidad, carinjo, bon comunicacion, profesionalismo, confiansa, lealtad, esfuerso, respet y lucha constante pa mehoracion continuo cu diariamente nos empleadonan ta eherce.

